

ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XLII No. 4
Pebrero 21, 2011
www.philippinerevolution.net

Editorial

Maghiliusa batuk sa mga pasistang pwersa nga kontra-kalinungan

Ang pinakamaitom nga gal-om nga nagalandong sa paglaum nga magsulong ang amadugay nga nauntat nga sugilanon pangkalinungan amo ang Armed Forces of the Philippines (AFP) kag ang bag-o sini nga plano nga Oplan Bayanihan (OPB). Wala untat ang mga masupog nga pasistang pwersa sa wala-tuo nga pag-upang kag panabotahe sa sugilanon.

Sa kada may magsublak nga paglaum nga magsulong ang pagsugilanon sa tunga sang National Democratic Front of the Philippines (NDFP) kag sang Gubyerno sang Pilipinas (Government of the Philippines o GPH), nagahulag ang mga masupog nga pwersa kontra-kalinungan agud mauntat ang pagsugilanon. Tuman kabugalon sang mga pasistang heneral sang AFP nga ideklarar ang kaugalingon bilang mga tagasakdag sang kalinungan samtang wala-tuo ang pagbastos nila sa mga nagaluntad nga kasugtanan kag pagtamay sa NDFP kag sa ser-yoso nga katuyuan sini sa pagsugilanon sa GPH.

Maluibon nga gindakop sang mga pasistang suldao kag pulis si Kaupod Alan Jazmines sa Baliuag, Bulacan sang Pebrero 14. Si Kaupod Jazmines isa sa mga kilala nga lider sang Partido Komunista kag nagapanguna nga konsultant sang NDFP sa sugilanon pangkalinungan. Sang dakpon


siya, hayagan nga ginlapak sang AFP ang Joint Agreement on Safety and Immunity Guarantees (JASIG). Gindakop siya sang AFP sa bisperas sang liwat nga pagbukas sang pormal nga pagsugilanon sa tunga sang NDFP kag GPH. Daw sa gingu-

ba sang AFP ang lubos nga ginakalangangan sang pumuluyo nga daku nga pagsulong sang pagsugilanon.

Gindakop si Ka Jazmines pila ka simana makaligad dakpon sang AFP si Tirso "Ka Bart" Alcantara. Si Ka Bart isa sa mga nagapanguna nga kadre sang Partido kag Bag-ong Hangaway sang Banwa (BHB) sa Southern Tagalog kag konsultant sa sugilanon pangkalinungan. Sa kabilugan, 15 konsultant na sang

NDFP nga imbolbado sa pagpasulong sang sugilanon pangkalinungan ang gin-aresto kag ginkulong sang AFP kag PNP. Tanan sila nagaatubang sang mga kaso kriminal nga gin-imbento sang militar kag pulis agud hatagan-rason ang ila madugay nga detensyon.

Nagapahambog ang AFP nga isa ini ka gahum nga indi pwede ipaidalom sa mga ginahimo sa



Mga tampok sa isyu nga ini...

Konsultant sg NDFP, gin-aresto sg militar
PAHINA 3

Pormal nga sugilanon pangkalinungan, ginbuksan
PAHINA 4

Ang pagtabon sg rehimen sa dagway sg kaimulon
PAHINA 7

tunga sang GPH kag NDFP. Tuman ka bugalon sini nga ginadeklarar nga indi pwede masuspinde sang sugilanon pangkalinungan ang mga operasyon sang militar kag pulis para sa “pagpatuman sang layi.” Bisan sa panahon sang 19-adlaw nga untat-lupok sadtong Disyembre-Enero, wala untat ang AFP sang pagsabwag sang terorismo sa ginalunsar sini nga mga “special operations” sa mga baryo sa mga prenteng gerilya. Nahimo pa nila nga tawgon ang mga ini nga “operasyon para sa kalinungan kag kauswagan.”

Wala sang interes ang mga pasistang upisyal sang rehimeng Aquino nga magmadinalag-on ang sugilanon pangkalinungan. Tuyo lang nila nga gamiton ang sugilangon para tiplangon ang pumuluyo kag pasurenderon ang mga rebolusyonaryong pwersa. Para sa mga upisyal sang militar kag pulis, wala sang iban nga kahulugan ang kalinungan kundi ang pagtapna sa tanan nga armadong pagbato kag paghimakas sang masa sang pumuluyo.

Kaundan sang OPB ang kontra-kalinungan nga polisiya sang militar. Nakapadron ini sa Counterinsurgency Guide sang US nga ang katuyuan amo nga ipabilin ang imperyalistang pagginahum sini sa Pilipinas kag iban pa sini nga malakolonya paagi sa pagtapna sa mga

Ang pinakamaitom nga gal-om nga nagalandong sa paglaum nga magsulong ang madugay na nga nauntat nga sugilanon pangkalinungan amo ang Armed Forces of the Philippines kag ang bag-o sini nga plano nga Oplan Bayanihan.

pwersa nga nagasakdag sang pungsodnon nga kahilwayan kag demokrasya sang pumuluyo.

Makita sa OPB nga wala sang interes sa matarung kag pangmalawigan nga kalinungan. Sandig sa OPB, ang deklarado nga katungdanan sang mga upisyal sang AFP kaangut sa sugilanon pangkalinungan amo nga “dingutan sang bentaha” sang NDFP sa pag-atubang sini sa GPH. Sa sini ginapakita sang AFP nga wala sang lugar sa pasistang pagpaminsar sini ang diwa sang patas nga pagsugilanon kag pagbuligay para atubangon ang mga halambalanon nga amo ang ugat sang gera sibil.

Ginapakita man sang AFP nga indi ini pwede mahigot sa natukod na o tukuron pa nga kasugtanan sa tunga sang NDFP kag GPH. Sa sini gusto ipakita sa pumuluyo nga mag-atras sa pagsugilanon para hatagan-rason ang padayon nga pagpa-singki sini sang pasista nga gera batuk sa pumuluyo.

Dapat mahibal-an sang tanan nga magamadinalag-on


lamang ang sugilanon pangkalinungan sa tunga sang NDFP kag GPH kon desaysibo nga tapuson ang pagpanabotahe diri sang mga masupog nga pasistang militar kag pulis. Indi makabulig sa sugilanon pangkalinungan ang polisiya sang rehimeng Aquino nga buy-an ang mga pasista nga ido sini sa AFP kag pabay-an ang mga ini nga basta lapakan ang tanan nga mga kasugtanan sang GPH-NDFP, lakip ang JASIG kag ang Comprehensive Agreement on Respect for Human Rights and International Humanitarian Law (CARHRIHL).

Nagahiliusa ang pumuluyo nga Pilipino sa handum nga agumon ang malawigan nga kalinungan nga nakabase sa kata-rungan. Angut sini, ginasupportahan nila ang sugilanon pangkalinungan sa tunga sang NDFP kag GPH paagi sa malaparan nga pagbato sa mga pasista nga pwersa nga kontra-kalinungan.

Dapat lubos nga ihayag kag batuan ang pagpanghalit sang AFP kag ang wala-unod nga salambiton sini nga “kalinungan kag kauswagan.” Dapat batuan ang pasista nga terorismo sini.

Muklat ang rebolusyonaryong pwersa nga ang negosasyon sang NDFP sa GPH mangin epektibo nga patag sang paghimakas para sa kalinungan kon himuon ini kadungan sang mga pangmasang paghimakas kag armadong pagbato sang pumuluyo. Kon amo, dapat pursigido nga isulong sang pumuluyo sa tanan nga patag sang paghimakas ang ila mga pungsodnon kag demokratikong handum nga amo ang salandigan sang ginahandum nila nga kalinungan.

AB



Tuig XLII No. 4 Pebrero 21, 2011

Ang *Ang Bayan* ginabalhag sa lenggwaheng Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa Philippine Revolution Web Central nga makit-an sa:

www.philippinerevolution.net

Nagabaton *Ang Bayan* sg mga kontribusyon sa porma sg mga artikulo kag balita. Ginabuyok man ang mga bumalasa nga magpaabot sg mga saway kag rekomendasyon sa ikauswag sg aton pahayagan. Malab-ot kami paagi sg email sa:

angbayan@yahoo.com

Kaundan

Editorial	1
Konsultant sg NDFP, gin-aresto	3
Pormal nga sugilanon pangkalinungan sg NDFP kag GPH	4
Aktibista, gin-aresto	4
Pagpanghalit sg pasistang estado	
CMO sa Mindanao, hayag nga nagalapas sa untat-lupok	5
Balasubas ang AFP	5
Madinalag-on nga opensiba sg BHB	
Ambus sa Kalinga	6
Mga bihag, ginhilway sg BHB	6
Suldalo, ginbihag sg BHB	6
Si Gen. Reyes, korapsyon sa AFP	7
Pagtabon sa dagway sg kaimulon	7
Balita	8

Ang *Ang Bayan* ginabantala duha ka beses kada bulan sg Komite Sentral sg Partido Komunista sg Pilipinas

Malahalon nga konsultant sang NDFP, gin-aresto sang militar

To hell with the JASIG! (“Wala kami sang labot sa JASIG!”). Ini ang bastos nga pagsabat sang upisyal nga nagdirihir sa pag-aresto kay Alan Jazmines, upisyal sang Partido Komunista sang Pilipinas (PKP) kag konsultant sa sugilanon pangkalinungan sang National Democratic Front of the Philippines (NDFP).

Si Jazmines gin-aresto sa isa ka balay sa Baliuag, Bulacan, mga alas-5:30 sang hapon sang Pebrero 14. Pilit nga ginsulod sang pila ka napulo nga gintingob nga mga pwersa sang 56th IB, 7th MIB sang 7th ID, 703rd Brigade, Intelligence Security Group, kag lokal nga pulis sang Bulacan ang ginadayunan niya nga balay. Samtang siya gina-aresto, gin-insister ni Jazmines nga siya protektado sang Joint Agreement on Safety and Immunity Guarantees kag indi pwede nga arestuhon. Pero baraghal ini nga ginbalewala.

Sa isa ka pahayag, ginsiling ni Jazmines nga ang iya nga *document of identification* nga gin-isyu sang NDFP santo sa JASIG may *reference number* nga 978213 sa ngalan nga Dodi Lapida. Sa pihak sang ginpahayag ni Jazmines ginapilit sang militar nga wala siya sang ginpakita nga pamatuod nga siya konsultant sang NDFP kag protektado sang JASIG. Santo sa JASIG, ginagarantiyahan ang kinamatarung sang mga konsultant kag istap sang magtimbang nga bahin batuk sa surbeylans, pag-aresto kag detensyon.

Gindala sang mga nag-aresto nga operatiba ang madamo nga bagay nga ginagamit ni Jazmines sa iya nga hilikuton bilang konsultant sang NDFP. Lakip diri ang mga kompyuter, papeles kag ang pondo nga ginagamit niya sa konsultasyon.

Ginrason sang AFP sa pag-aresto kay Jazmines ang pagkadalagig kuno niya sa 13 kaso sang pagpatay sang 1989 sa Quezon. Pareho sang ginahimo sa iban nga mga konsultant kag

istap sang NDFP nga ginaaresto, himuhimo lang ang kaso kriminal nga ginpasaka kontra sa iya.

Sa pag-aresto kay Jazmines sa bisperas sang pagbukas sang sugilanon pangkalinungan sadtong Pebrero 15, gusto ipakita sang AFP nga sarang gid sini nga lapakan ang JASIG kag iban pa nga kasugtanan sa sugilanon pangkalinungan nga wala man lang ginapitik sang ila *commander-in-chief*. Salambiton nila ang pagsuporta sa proseso pangkalinungan, pero sa aktwal ginaguba nila ang paborable nga kundisyon para sa sugilanon pangkalinungan nga gintinguhaan bilugon sang mga panel sang magtimbang nga bahin.

Suno sa pahayag nga ginpaguwa ni Jazmines halin sa priso-han, hayag nga pagbastos kag panabotahe sa proseso pangkalinungan ang pag-aresto sa iya sang mga operatiba sang militar kag pulis. Siling niya, mas maayo nga lubaron anay ang paglapas sang GPH sa JASIG antes magkadto sa iban nga adyenda sa sugilanon pangkalinungan. Nakatalana nga sugilanonan ang Comprehensive Agreement on Socio-Economic Reforms.

Si Jazmines nagtapos sang Engineering sa Ateneo de Manila University kag anay manunudlo sa Asian Institute of Management. Duha ka beses siya nga ginbilanggo sadtong panahon sang diktaduryang Marcos kag nangin detenido pulitikal sa sulod sang pito ka tuig. Isa siya sa mga tagapundar sang Partido ng Bayan. Nakakulong siya subong sa PNP Custodial Center sa Camp Crame.

Sa kaangut nga balita, gi-



Kaupod Alan Jazmines

napanawagan sang mga grupo nga tagapangapin sang tawha-nong kinamatarung kag iban pa nga nagasuporta sa sugilanon pangkalinungan ang gilayon nga paghilway kay Jazmines kag 13 pa nga konsultant sang NDFP.

Ginainsister man sang Samahan ng mga Ex-Detainees Laban sa Detensyon at para sa Amnestiya (SELDA) nga hilwayon indi lang si Jazmines kundi ang iban pang mga detenido pulitikal bilang pagrespeto sa JASIG kag “tikang para sa maayo nga kabubut-on.”

Suno sa SELDA, madamo sa ila ang sobra lima ka tuig na nga ara sa kulungan kag tanan nga biktima sang pagpamigos kag opensibang ligal sang administrasyon Arroyo. Lakip diri sanday Glicerio Pernia, Eduardo Serrano, Eduardo Sarmiento, Jovenicio Balweg, Randy Malayao, Emeterio Antalan, Eduardo Friginal, Jaime Soledad, Alfredo Mapano, Tirso Alcantara, Ma. Luisa Pucray, Edwin Brigano kag Pedro Codaste.

Ginahingyo man nila ang gilayon nga pagtuhaw kag paghilway sa mga konsultant nga *desaparecido*, lakip sanday Leo Velasco, Leopoldo Ancheta, Rogelio Calubad (gindukot upod ang anak niya nga si Gabriel), Prudencio Calubid kag iban pa. **AB**

Pormal nga sugilanon pangkalinungan sang NDFP kag GPH, ginbuksan sa Norway



Sa pihak sang pagpanabotahe sang AFP, nadayon ang pagbukas sang pormal nga sugilanon pangkalinungan sa tunga sang National Democratic Front of the Philippines kag sang Government of the Philippines (GPH) sadtong Pebrero 15 sa Oslo, Norway. Magadalagan ang pormal nga sugilanon tubtub sa Pebrero 21. Kaangut sini, dungan nga ginpaluntad sang magtimbang nga bahin ang untat-lupok sa pareho nga panahon.

Sa pagbukas sang negosasyon, gilayon nga ginpanawagan sang NDFP Negotiating Panel nga ginapamunuan ni Kaupod Luis Jalandoni ang paghilway kay Kaupod Alan Jazmines, Ericson Acosta, 14 pa nga mga konsultant para sa sugilanon pangkalinungan kag ang nabilin pa nga myembro sang Morong 43. (Basahon ang mga kaangut nga artikulo.)

Aktibista, gin-aresto

Gin-aresto sang mga elemento sang 34th IB si Ericson Acosta, 37, isa ka aktibista kag anay lider estudyante, sa Barangay Bay-ang, San Jorge, Samar bandang alas-10 sang aga sadtong Pebrero 13. Suno sa nakalap nga report, pasakay sadto si Acosta sa isa ka bangka nga de-motor pakadto sa banwa sang San Jorge sang hinali lang siya nga dakpon sang mga suldado. Ginkuha ang iya mga personal nga gamit kag kwarta.

Si Acosta *literary editor* sang *Philippine Collegian* sa University of the Philippines-Diliman sadtong 1993 kag myembro sang isa ka pangkultura nga organisasyon kag alyansa. Gintamnan si Acosta sang granada kag ginpasakaan sang kaso kriminal sa Regional Trial Court Branch 41-Gandara Police Office sa Samar.

Mabaskog nga ginkundenar sang lainlain nga grupo ang pag-aresto kay Acosta. Ginakakulbaan sang iya mga abyan kag pamilya nga napaidalom siya sa tortyur labi pa wala gilayon siya nga gintuhaw. Ginhingyo nila nga respetuhon ang iya mga kinamatarung.

Nagtambong sa pagbukas sang negosasyon sanday State Minister Espen Barth Eide kag Ambassador Ture Llundh bilang mga representante sang Norwegian Royal Government, ang nagatindog Third Party Facilitator. Nagpamulong-pulong ang mga representante sang magtimbang nga panel—si Kaupod Jalandoni sa bahin sang NDFP kag sa GPH si Teresita Quintos-Deles, Presidential Peace Adviser sang administrasyon Aquino.

Ang naplastar nga adyenda subong mga sosyo-ekonomikong reporma. Sa bahin sang NDFP, ang talakayan pamunuan ni Kaupod Jose Maria Sison, tagapundar nga pangulo sang Partido Komunista sang Pilipinas kag pangunahon nga konsultant pangpulitika sang NDFP sa sugilanon pangkalinungan.

Samtang, malipayon nga ginbalita ni Fr. Diony Cabillas sang Samahan ng Ex-Detainees Laban sa Detensyon at para sa Amnestiya (SELDA) nga nahilway na si Ka Angelina Bisua Ipong, 66 anyos, isa sa 14 nga nakulong nga konsultant para sa sugilanon pangkalinungan. Ginhilway si Ipong sang Pebrero 17 pagkatapos ang 6 tuig nga pagkakulong. Gin-aresto siya sang mga pulis kag militar sa Aloran, Misamis Occidental sang Marso 8, 2005. Pila ka adlaw siya nga ginpaidalom sa interogasyon, tortyur kag sekswal nga pagpang-abuso.

Ginhilway man si Edwin Dematera, 39 anyos, isa sa tatlo ka detenido nga nalakip sa Morong 43 nga wala ginhilway sadtong Disyembre. May duha pa nga nakakulong, maluwas pa sa lima nga gindetendir gihapon sa Camp Capinpin, Tanay, Rizal nga ginasulsulan sang militar nga mangin saksi sang gubyerno kontra sa ila kaupdan.



CMO sa Mindanao, hayag nagalapas sa untat-lupok

Mabaskog nga ginpakamalaut ni Jorge “Ka Oris” Madlos, tagapamababa sang National Democratic Front sa Mindanao ang nagapadayon nga mga *civil-military operation* (CMO) sa isla bilang hayag nga paglapas sa nagaluntad nga untat-lupok subong nga Pebrero 15-21.

Suno kay Ka Oris, nagasulod sa mga baryo ang mga elemento sang AFP, PNP kag CAFGU para maglunsar kuno sang “kalinungan kag kauswagan.” Pero sa aktwal nagtungang sila sa duha ka grupo kon sa diin ang una nagtum-ok sa mga operasyon saywar kag ang ikaduha nagtum-ok sa *security clearing operations*.

Ginapatambong nila ang tagabaryo sa mga pulong kag ginapilit nga magpaguwa sang impormasyon bahin sa BHB. Ginakuhaan man sang bidyo ang

mga tawo nga wala sang panugot. Pagkatapos sini “ginaimbitahan” ang pila ka indibidwal para interogahon bahin sa presensya sang BHB o mga aktibistang masa sa baryo. Ang mga indi magbulig sa ila ginapahog o ginabakol. Madamo ang pwersahan nga ginarekrut sa CAFGU.

Siling ni Ka Oris, lapas ang CMO sa untat-lupok bangud sa masunod:

►ang mga ini opensibong operasyon militar kontra sa BHB

kag rebolusyonaryong masa sa mga ginadudahan nga erya sang BHB kag ginalunsar malayo sa mga kampo o detatsment sang militar;

►ang pag-imbestiga o interogasyon sa idalom sang mga CMO amo ang mga operasyon paniktik, nga bahin sang mga opensibong operasyon militar;

►ang mga pamahog kag mga pagpangbakol sa mga sibilyan sa tunga sang mga CMO paglapas pareho sa tawhanong kinamatarung kag untat-lupok.

Ginhangkat ni Ka Oris si Benigno Aquino III nga ipakita ang iya awtoridad bilang *commander-in-chief* paagi sang pagpangibabaw sa mga mapanggera nga elemento sang AFP kag pagmandu sa ila nga untaton ang tanan nga CMO sa panahon sang untat-lupok. **AB**

Balasubas ang AFP

Wala sang pili nga ginlapas sang Armed Forces of the Philippines ang ginkasugtan nga untat-lupok subong nga Pebrero 15-21 sa Masbate, Sorsogon kag Bukidnon.

Masbate. Nag-atake ang mga tropa sang 9th IB kag 903rd Brigade sadtong Pebrero 16 sa mga banwa sang Mobo kag Uson. Basta lang nagpinalupok sang mga pusil ang mga suldado bisan wala sang kaaway, bagay nga nagbunga sang mabaskog nga kahadlok sa mga sibilyan sa lugar. Natabo ang pagpalupok sa Sityo Binusbusan sa San Jose, Uson; Sityo Makamote sa Sawmill, Mobo; Sityo Bailan sa Bagacay, Mobo; kag sa Sityo Cabagnan sa Baang, Mobo.

Sorsogon. Wala maghalin sa ginatambayan nga mga baryo ang mga tropa sang 49th IB nga halin pa sang Oktubre 2010 nagalunsar na sang operasyon RSOT sa 19 barangay sa mga banwa sang Gubat, Casiguran, Bulan kag Barcelona kag sa Sorsogon City. Sa Bulan, 24 elemento sang militar nga nag-operasyon sang Oktubre 11 nga bandang alas-7 na lang sang aga nagbalik sa ila kampo sadtong Pebrero 15.

Bukidnon. Malaparan nga operasyon militar ang ginlunsar sang mga elemento sang 8th IB sa lima ka banwa sang prubinsya.

Duha ka trak sang mga tropa sang 8th IB kag PNP ang nagkadto sa Barangay Osmena, Danggagan sadtong Pebrero 15-16 para pwersahan nga tipunon ang mga tagabaryo kag kuhaan sang datos paniktik.

Sadtong Pebrero 15 man, isa ka iskward sang 8th IB ang naglunsar sang operasyon kumando sa tubuhan sa Barangay Kauyongan, Kitaotao. Kadungan sini, duha pa ka trak sang mga suldado sang 8th IB kag duha ka *patrol car* sang PNP Regional Mobile Group ang nag-operasyon sa Barangay Kalumihan sang pareho nga banwa.

Sa banwa sang Don Carlos, isa ka dyip nga puno sang militar ang naglunsar sang *combat patrol* sa Barangay San Nicolas-Banban. Isa man ka M35 trak nga may mga elemento sang 8th IB ang nagpatrulya sa mga barangay sang Bagsak kag Pinamaloy.

Sa Barangay Namnam, San Fernando, isa ka trak sang mga suldado sang 8th IB ang liwat nagposte sa isa ka detatsment nga daan nila nga gin-abandona.

Sa Quezon, Bukidnon, nagapadayon giha-pon ang mga operasyon militar umpisa sadtong Pebrero 10. **AB**



Mga bihag, ginhilway sang BHB

Ginhilway sang mga Pulang Hangaway sang Bag-ong Hangaway sang Banwa ang ila duha ka bihag sang gera nga sanday M/Sgt. Mario Veluz kag P03 Jorge Sabatin sa duha ka separado nga lugar sang Pebrero 18.

Si Veluz gin-entregar sang Herminio Alfonso Command sang BHB (HAC-BHB) kay Gov. Emmylou Mendoza sang North Cotabato. Suno kay Ka Isabel Santiago, tagapamaba sang HAC-BHB, si Veluz napamatud-an sang hukmanan sang pumuluyo nga wala sang malala nga krimen kontra sa rebolusyonaryong hublag.

Nabihag siya sa isa ka tsekpoynt nga gintukod sang mga Pulang hangaway sang BHB sa kaha-baan sang haywey sang Davao-Bukidnon sang Pebrero 6. Nakumpiska sa iya ang isa ka pistola nga kal. 45.

Si P03 Sabatin, elemento sang Agusan del Sur Police Mobile Group, gin-entregar sang mga Pulang hangaway sang Conrado Heredia Command (CHC-BHB) sang BHB sa mga upisyal sang isa ka barangay. Gindakop siya sang Pebrero 1 pagkatapos ambuson sang mga Pulang hangaway ang isa ka tsekpoynt sang PNP sa Trento, Agusan del Sur. Nag-agom siya sadto sang indi malubha nga pilas sa tiil kag gilayon nga ginhatagan sang atensyon medikal sang mga medik sang BHB. AB


3 suldado, patay sa ambus sa Kalinga

Tatlo ka suldado ang napatay sang ambuson sang Lejo Cawilan Command sang Bag-ong Hangaway sang Banwa ang mga elemento sang 21st IB sa Tanglag, Lubuagan, Kalinga sang Pebrero 8. May ara man nga indi pa mahibal-an nga isip sang mga suldado nga napilasan.

Ang mga gin-ambus nga suldado lakip sa mga tropang militar nga wala untat sa paglagaw sa Kalinga halin Setyembre 2010. Halin sining tungatunga sang Enero naglunsar na ang mga ini sang mga ginpasingki nga operasyon kombat kag *civil-military* sa mga banwa sang Pinukpuk kag Balbalan. Sa Malibcong kag Lacub, koordinado ang mga operasyon sini sa 41st IB.

Nagsaylo sang ulihi ang mga operasyon pakadto sa mga bahin sang Kalinga kag sa mga banwa sang Boliney, Daguioman kag Sallapadan sa Abra, kon sa diin mga tropa sang 50th IB ang kakoordina nila.

Pagkatapos ang ambus sa Lubuagan nagkampo ang mga suldado sang 21st IB sa Tanglag kag nagdayon sa mga balay sang mga tagabaryo kag sa mga sibilyan nga pasilidad. Lapas ini sa mga pagsulondan sang inaway nga nagahatag sang proteksyon sa mga sibilyan. Bangud indi na maghalin diri ang mga suldado ginlapas man nila ang untat-lupok sining Pebrero 15-21. AB



Suldado, ginbihag sang BHB sa ComVal

Gindakop sang Front 25 Operations Command sang Bag-ong Hangaway sang Banwa (BHB) sa Southern Mindanao Region ang isa ka elemento sang 5th Scout Ranger Company. Si Pfc. El Bryan Canedo, 23, gin-aresto sa isa ka *mobile checkpoint* sang BHB sa Barangay Maparat, Compostela Valley mga alas-6 sang aga sadtong Pebrero 7. Isa ka pistola

nga 9mm ang nakumpiska sa iya.

Ginaimbestiga si Canedo subong bahin sa posible nga krimen batuk sa rebolusyonaryong hublag. Sa isa ka *audio clip* nga ginpadala sa midya sang Pebrero 17, nagapanawagan si Canedo sa militar kag pulisya nga untaton na ang mga opensibo nga operasyon para salbaron siya bangud makasablag lamang

ini sa pagproseso sang iya paghilway. Ginapasiguro man niya sa iya pamilya nga maayo man ang iya pagtulog kag pagkaon kag lubos nga ginarespeto ang iya kinamatarung bilang bihag sang gera.

Luwas sa *audio clip* nagpadala man ang BHB sang retrato ni Canedo nga nagabasa kag nagayuhom nga nagainom halin sa sartin. AB

Pagpakamatay ni Gen. Reyes kag korapsyon sa AFP

Labi nga nangin kumplikado Lang imbestigasyon sang kagarukan sa sulod sang Armed Forces of the Philippines (AFP) sang magpakamatay si Ret. Gen. Angelo Reyes sang Pebrero 8. Sa pihak nga bahin, labi man sini nga ginhatagan sang tum-ok ang kadalom kag kalapad sang sistematikong korapsyon sa bug-os nga reaksyunaryong sistema.

Si Reyes anay Chief of Staff sang AFP lunsay sang rehimeng Estrada kag Arroyo kag sekretaryo sang Department of National Defense kag iban pa nga departamento sa idalom sang rehimeng Arroyo. Ginpamunuan niya ang madugo nga kampanya sang rehimeng Estrada batuk sa pumuluyong Moro. Sa idalom sang pagpamuno niya sa AFP ang pagpatuman sang pasista nga kampanyang Oplan Bantay Laya.

Gin-umid ni Ret. Lt. Col. George Rabusa si Reyes sa sistematiko nga pagpangurakot sa pondo sang AFP. Suno kay Rabusa, anay *budget officer* sang AFP, nagbulsa si Reyes kag iya asawa sang indi magnubo sa P150 milyon sang panahon nga ginapamunuan niya ang AFP.

Wala madiskaril sang pagpakamatay ni Reyes ang imbestigasyon sa Senado kag Kongreso. Labi nga wala sini mapaugdaw ang kaakig kag pagkangilad sang pumuluyo kag ordinario nga suldado kag bataon nga upisyal sa kagarukan sang bilog nga AFP. Ginakanugnan sang pumuluyo nga wala mabuyagyag ang iban pa nga nahibal-an ni Reyes, labi na ang direktang papel ni Gloria Arroyo sa korapsyon sa AFP. **AB**

Nabulgar nga salamangka sa estadistika

Ang pagtabon sang rehimen sa dagway sang kaimulon



Sa baylo nga magpatuman sang mga programa agud matuod nga atubangon ang lapnagon nga kaimulon sa pungsod, ginpalabnaw na lang sang rehimeng Aquino ang kahulugan sang kaimulon agud paguwaon nga nabuhinan ang numero sang mga imol.

Paagi sa bag-o nga talaksan sang kaimulon nga gin-umpisahan gamiton sang National Statistical Coordination Board (NSCB) sang 2009, ginapaguwa subong sang rehimen nga P46 na lang sa kada adlaw ang kinahanglanon sang kada Pilipino para mabuhi. Mas magamay ini sa daan na nga manubo nga talaksan nga P52 nga amo ang daan nga gintalana nga lebel sang kaimulon. Sa bag-o nga talaksan, natigayon sang rehimen nga buhinan ang numero sang imol sa pungsod sang 5.32 milyon katawo.

Bunga sang pagnubo sang talaksan sang kaimulon, ginapaguwa subong sang gubyerno Aquino nga 2.6% na lang sa nagapuyo sa Metro Manila ang

ginakabig sini nga imol.

Ang matuod, kon padayon nga pagagamiton sang rehimen ang daan nga pamaagi sang pagtanya sa kaimulon, naga-guwa nga nadugangan pa sang 850,000 katawo sang 2009 ang numero sang imol nga Pilipino halin sa datos sang 2006. Ini na ang ikaapat ka beses nga ginpanubo sang NSCB ang talaksan sang kaimulon halin 1991.

Sa idalom sang bag-o nga talaksan sang NSCB, ginbag-o sini ang konsepto sang "food bundles" o bugkos sang pagkaon nga ginakonsumo sang mga Pilipino sa kada adlaw. Sa bag-o nga talaksan sang NSCB, wala naupod ang galunggong nga isda sa inadlaw nga ginakaon

kag ginbayluhan ini sang monggo.

Dugang pa, indi lang ginpanubo ang talaksan sa pagkaon kundi sang iban pa nga mga kinahanglanon sang kada Pilipino para mabuhì. Sa pamasahè pa lang, ang P46 nga talaksan sang gubyrno tuman ka kulang sa isa ka ordinaryo nga mamumugon nga nagasakay sa MRT. Pakadto pa lang sa trabaho mahimo nga maggasto na siya sang P30 nga magakaon na gilayon sa daku nga bahin sang balor nga P46 nga talaksan sang rehimen. Maluwas pa sa pagkaon kag pamasahè, ara pa ang iban pa nga balaklunon kag balayran pareho sang LPG, matrikula kag galastuhon medikal nga wala-tuo ang pagsaka.

Daku nga insulto sa pumulyo ang bag-o nga pamaagi sang rehimen nga Aquino sa pagtalana sang talaksan sa kaimulon. Madamol ang guya sini nga maghambal nga nabuhinan na ang imol nga Pilipino amo nga padayon nga nagahanot sa pumulyo ang mga epekto sang mga polisiya nga denasyunalisasyon, pribatisasyon kag deregulasyon sa pungsod. Nagapabulag-bulag ang rehimen sa madugay na nga panawagan sang mga mamumugon kag propesyunal nga manubo ang kita para sa matarung kag nagakaigo nga sweldo. Wala man ini sang tikang para sabton ang mga demanda sang mga mangunguma kag mamumugon sa uma.

Ang pagtabon sang rehimen nga Aquino sa dagway sang kaimulon sa pungsod wala sang kinalain sa pagtakop ni Gloria Arroyo sang Abril 2005 sa datos sang wala sang pangabuhian. Ginpagamay ni Arroyo ang numero sang mga wala sang pangabuhian sang 1.5 milyon kag ang tantos sang wala sang pangabuhian sang 3.6% amo nga wala man ini sang ginhimo nga tikang nga mabuhinan ini. **AB**

GARB, suportado sang mga mangunguma sang Central Luzon

DAPAT gilayon nga ipatuman ang tunay nga repormang agraryo. Ini ang demanda sang mga mangunguma halin sa Central Luzon sang magtambong sila sa pagbista sang House Committee on Agrarian Reform sang Pebrero 17. Ginpahayag nila ang lubos nga pagsuporta nila sa HB 374 o Genuine Agrarian Reform Bill (GARB).

Ang delegasyon nga nagtambong sa pagbista ginpamunuan ni Joseph Canlas, pangulo sang Alyansa ng mga Magbubukid sa Gitnang Luzon. Nag-upod man sa pagbista ang mga katapu sang Alyansa ng mga Magbubukid sa Hacienda Luisita (AMBALA). Hayagan nga gindeklarar sang mga mangunguma nga ginasuportahan nila ang GARB kag ginasiway ang CARPER (Comprehensive Agrarian Reform Program with Extension and Reforms).

Suno sa ila, wala sang pulos para sa ila ang CARP o CARPER bangud wala ini nagahatag sang proteksyon sa ila kina-

matarung sa duta. Sa kamatuoran, siling ni Canlas, ginsalbar pa sang CARP ang pamilya Cojuangco-Aquino sa Hacienda Luisita paagi sa Stock Distribution Option (SDO).

Gintumod sang mga mangunguma ang mga problema sa duta kon sa diin ginadampigan sang CARP ang interes sang daku nga agalon nga mayduta sangsa interes sang mga mangunguma. Pila ka halimbawa ang 3,100 ektarya nga Fort Magsaysay Military Reservation (FMMR) sa Laur, Nueva Ecija 375 ektarya nga duta sa San Miguel, Bulacan nga ginaangkon ni Rep. Luis Villafuerte; kag pagdemolis sang pamilya Pineda sa 200 puluy-an sang mga mangunguma sa 200 ektarya nga duta sa Baryo Prado Siongco, Lubao, Pampanga. May mga kinagamo man sa duta sa Baryo Balangcinaway sa Bayambang, Pangasinan; sa Baryo San Roque, sa La Paz, Tarlac; kag sa banwa sang Orion, Bataan.

BLWU, indi pagkilalahon sang DOLE

PADAYON nga ginaipit sang Bleustar Manufacturing and Marketing Corporation (BMMC) ang mga mamumugon sini makaligad ini magsulod sa bag-o nga *collective bargaining agreement* (CBA) sang Nobyembre 2010. Madumduman nga nagwelga ang Bleustar Workers Labor Union (BLWU) sang nagligad nga tuig para iprotesta ang mga paglapas sang maneydsment sa ila nga mga kinamatarung. Lakip sa mga paglapas ang pagbungkag sang unyon, *sexual harassment* kag iban pa nga *unfair labor practice*. Makaligad mapirmahan ang bag-o nga CBA, gilayon nga ginsumiter sang BLWU ang bag-o nga kasugtanan sa Department of La-

bor and Employment (DOLE) para irehistro ini.

Rason sang DOLE, may ginpasaka kuno nga petisyon ang dalag nga unyon sa sulod sang BMMC nga nagahambal wala sang unyon sa sulod sang kumpanya kag wala sang CBA sa tunga sang maneydsment kag obreros. Bangud diri, kinahanglan kuno maglunsar sang *certification election* para tukuron ang bag-ong unyon.

Ang nasambit nga dalag nga unyon, ang Advan United Workers Union (AWLU) katapu sang dalag nga Trade Union Congress of the Philippines (TUCP).

Nagapati ang BLWU nga padihot lamang sang maneydsment kag sang DOLE ang pag-

pasaka sang AWLU sang petisyon para bungkagon ang lehitimo nga unyon kag mabalewala ang CBA. Pamatuod sini ang gilayon nga pagdampig sang DOLE sa wala sang basehan nga petisyon sang AWLU.

Mga estudyante sang UE, nag-walkout sa klase

GINATOS ka estudyante sang University of the East-Manila ang nag-walkout sa ila mga hulot-klasehan para pamatukan ang nagahana nga pagsaka sang matrikula. Ang paghulag ginpamunuan sang UNITE-UE kag iban pa nga progresibo nga organisasyon.

Ginapamatukan sang mga nagprotesta ang 5-10% pagsaka sang matrikula, amo man ang dugang P200 sa ila nga *miscellaneous fees*. Suno kay Jade Valenzuela sang UNITE-UE, mabudlay para sa mga estudyante nga makatuon bangud sa pagsaka sang matrikula kag iban pang balayran.

Samtang, plano man sang iban nga eskwelahan nga magpasaka sang matrikula. Lakip diri ang Lyceum of the Philippines, Philippine School of Business Administration, University of Sto. Tomas, Far Eastern University kag University of the Philippines.

Ginhingyo man ni Rep. Raymond Palatino sang Kabataan Party sa mga eskwelahan sa elementarya, hayskul kag kolehiyo nga tugutan ang mga tumuluon nga makakuha sang eksamin bisan wala pa sila makabayad. Ini santo man sa ginpagwa nga mandu sang DepEd kag Commission on Higher Education sang 2010. Suno kay Palatino, madamo sang nabaton nga reklamo ang Kabataan Partylist bahin sa mga eskwelahan nga nagalapas sa mandu nga ini. Nagproponer man siya sang layi sa Kongreso nga pormal nga nagadumili sa mga kapitalista nga tag-iya sang mga eskwelahan kag nagatalana sang mas mabug-at nga silot kag kanselasyon sang mga permit sang mga eskwelahan nga maglapas diri. Dugang ni Palatino, dapat konsiderahon sang mga eskwelahan ang sunod-sunod nga pagsaka sang presyo sang mga balaklunon, pamasaha kag balayran sa eskwelahan.

Bahrain, sentro sang mga pag-alsa sa mga pungsod sang Arabo

PAGKATAPOS mapukan si Pres. Hosni Mubarak sang Egypt sang Pebrero 11, ang pungsod Bahrain na subong ang sentro sang mga pag-alsa sang pumuluyo sa Middle East kag North Africa. Madasig man naglapta ang pag-alsa sa Yemen, Oman, Libya, Algeria, Morocco, Kuwait kag Iran.

Labi nga nagbukal sa kaakig ang pumuluyo sang Egypt sang magpamulong-pulong si Mubarak nga indi siya magpanaog sa poder tubtob indi mahiwat ang eleksyon sa Septyembre para kuno maareglo nga mapasa ang gahom. Dali-dali nga nagmaniobra ang imperyalistang US kag pinakamasupog sini nga tuta nga Israel. Pagkaaga, Pebrero 11, gin-agaw sang militar ang gubyrno samtang pila ka gatos ka libo nga Egyptian ang nagdagsa sa kalsadahan. Pagkatapos sang 18 adlaw nga protesta, napukan ang tatlo ka dekada nga paghari ni Mubarak. Dali-dali nga nagsakay sa eroplano si Mubarak kag iya nga pamilya halin Cairo pakadto sa isa ka resort sa Sharma el-Sheik.

Samtang, sa Bahrain, apat na ang napatay kag mada-mo ang napilasan sa Bahrain sa sulod sang tatlo ka adlaw nga pagprotesta. Nag-umpisa sang Pebrero 13 ang mga panawagan nga halugan sang nagahari nga Muslim nga Sunni ang pagpadalagan nila sang gubyrno kag mahatagan sang kahigayunan ang mayorya nga sekta sang Shiite. Katapusan, naglab-ot ang protesta sa pagduso sang dugang nga trabaho, mas maayo nga pabalay, paghilway sa tanan nga bilanggo nga pulitikal kag pagwasak sa 200-tu-ig nga paghari sang mga Sunni.

Tuman nga nagakabalaka si Pres. Barack Obama sang US sa dalagan sang mga hitabo bangud ang Bahrain ang pinakastratehiko nga alyado sang US para makontra ang impluwensya sang Iran sa mga pungsod Arabo. Wala mapautat sang pagpanagtag sang kwarta sa kada pamilya ang mga protesta. Suno sa pinakaulihi nga mga report, nagaabot na sa 23 ang gin-aresto sang mga pulis sa pihak sang paabot ni Obama sa alyado sini nga maghinay-hinay.

Nagalapnag man subong ang mga aksyon protesta sa pungsod Yemen, ang pinakaimol sa mga pungsod Arabo kag yabi nga alyado sang US bangud sa anti-teroristang kampanya sini sa rehiyon sang Gulpo. Ginapamilit sang pumuluyo nga Yemeni nga magbiya na sa poder si Pres. Ali Abdullah Saleh. Mga tatlo ka dekada man nga naghari si Saleh sa pungsod nga ini kag sa 2013 pa magatapos ang iya termino.

Sa Oman naman, gin-anunsyo ni Sultan Qaboos ang pagpasaka sang bulanan nga sweldo halin 140 *rials* (\$365) pakadto 200 *rials* (\$520) para sa kada mamumugon sa pribado sa kahadlok nga mapaupod sa mga pungsod nga nagaalsa ang iya kaharian.

Sa Libya, nangin madugo ang protesta sang palukpan halin sa helikopter sang mga Revolutionary Guards ni Moamar Ghadafi ang mga demonstrador. Suno sa pinakaulihi nga report, nagaabot na sa 200 ang napatay sa mga demonstrador.



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XLII No. 4
Pebrero 21, 2011
www.philippinerevolution.net

Editorial

Maghiliusa batuk sa mga pasistang pwersa nga kontra-kalinungan

Ang pinakamaitom nga gal-om nga naga-landong sa paglaum nga magsulong ang amadugay na nga nauntat nga sugilanon pangkalinungan amo ang Armed Forces of the Philippines (AFP) kag ang bag-o sini nga plano nga Oplan Bayanihan (OPB). Wala untat ang mga masupog nga pasistang pwersa sa wala-tuo nga pag-upang kag panabotahe sa sugilanon.

Sa kada may magsublak nga paglaum nga magsulong ang pagsugilanon sa tunga sang National Democratic Front of the Philippines (NDFP) kag sang Gubyerno sang Pilipinas (Government of the Philippines o GPH), nagahulag ang mga masupog nga pwersa kontra-kalinungan agud mauntat ang pagsugilanon. Tuman kabugalon sang mga pasistang heneral sang AFP nga ideklarar ang kaugalingon bilang mga tagasakdag sang kalinungan samtang wala-tuo ang pagbastos nila sa mga nagaluntad nga kasugtanan kag pagtamay sa NDFP kag sa ser-yoso nga katuyuan sini sa pagsugilanon sa GPH.

Maluibon nga gindakop sang mga pasistang suldado kag pulis si Kaupod Alan Jazmines sa Baliuag, Bulacan sang Pebrero 14. Si Kaupod Jazmines isa sa mga kilala nga lider sang Partido Komunista kag nagapanguna nga konsultant sang NDFP sa sugilanon pangkalinungan. Sang dakpon

siya, hayagan nga ginlapak sang AFP ang Joint Agreement on Safety and Immunity Guarantees (JASIG). Gindakop siya sang AFP sa bisperas sang liwat nga pagbukas sang pormal nga pagsugilanon sa tunga sang NDFP kag GPH. Daw sa gingu-


ba sang AFP ang lubos nga ginakalangangan sang pumuluyo nga daku nga pagsulong sang pagsugilanon.

Gindakop si Ka Jazmines pila ka simana makaligad dakpon sang AFP si Tirso "Ka Bart" Alcantara. Si Ka Bart isa sa mga nagapanguna nga kadre sang Partido kag Bag-ong Hangaway sang Banwa (BHB) sa Southern Tagalog kag konsultant sa sugilanon pangkalinungan. Sa kabilugan, 15 konsultant na sang

NDFP nga imbolbado sa pagpasulong sang sugi-

lanon pangkalinungan ang gin-aresto kag ginkulong sang AFP kag PNP. Tanan sila nagaatubang sang mga kaso kriminal nga gin-imbento sang militar kag pulis agud hatagan-rason ang ila madugay nga detensyon.

Nagapahambog ang AFP nga isa ini ka gahum nga indi pwede ipaidalom sa mga ginahimo sa



Mga tampok sa isyu nga ini...

Konsultant sg NDFP,
gin-aresto sg militar
PAHINA 3

Pormal nga sugilanon
pangkalinungan,
ginbuksan
PAHINA 4

Ang pagtabon
sg rehimen sa dagway
sg kaimulon
PAHINA 7